

- कोटा, बूंदी, बारां अर सवाईमाधोपुर जिलां मांय घणा ज़ोरदार मेह बीचे हालात मुश्किल व्ह्या- सेना, एनडीआरएफ अर एसडीआरएफ री टीमां घणी बिरखा रा असर वाळा लोगां ने दूजी ठौड़ां पूगा रही है।
- राज्य मंत्रिमण्डल री मीटिंग मांय विकसित राजस्थान 2047 विजन डॉक्यूमेंट ने मंजूरी दीरीजी।
- प्रधानमंत्री नरेन्द्र मोदी कह्यो-भारत बेहतर तकनीक सागे अंतरिक्ष रा हलका मांय तेज़ी ऊं आगे बढ़ रह्यो है।
- जीएसटी परिषद् री 56वीं मीटिंग 3 अर 4 सितम्बर ने नई दिल्ली मांय व्हेला।

000

राज्य रा ऊगणी हलका मांय बरस रह्या ज़बरदस्त मेह रे कारण कोटा, बूंदी, बारां अर सवाईमाधोपुर जिलां मांय बाढ़ सरीखा हालात बण गया है। सेना, एनडीआरएफ अर एसडीआरएफ री टीमां न्यारी-न्यारी ठौड़ां फस्योड़ा 200 ऊं बत्ता लोगां ने दूजी ठौड़ां पूगायी ज्या। गृहराज्य मंत्री जवाहर सिंह बेदम अर आपदा राहत मंत्री डॉ. किरोड़ी लाल मीणा आज सवाईमाधोपुर जिला रा सूरवाल, अजनोटी अर मैनपुरा समेत घणी बिरखा रा असर वाळा अर दूजा हलकां रो दौरा कर र हालात रो जायज़ो लीनो। दूजी कानी लोकसभा अध्यक्ष ओम बिरला ने कोटा-बूंदी संसदीय हलका रा हवाई सर्वे रो कार्यक्रम खराब मौसम रे कारण टाळणो पड़्यो। ई बीचे कोटा संभाग मांय भारी बारिश रो सिलसिलो आज ई चालतो रह्यो। कोटा बैराज रा दो दरुजा खोल र 14 हजार क्यूसेक पाणी निकाळी ज्यो। घणी बरसात रे कारण 100 ऊं बत्ता गांव कोटा ऊं न्यारा रह गया है। करौली जिला रा पांचना बंधा ऊं ई चार दरुजा खोल र बत्तो पाणी निकाळ्यो जा रह्यो है। मण्डरायल मांय चम्बल नदी ई खतरा रा निशान ने पार कर गयी है। धौलपुर मांय ई जिला प्रशासन चम्बल नदी री कोर कने बस्योड़ा सगळा गांवां मांय हाई अलर्ट रो ऐलाण कर दीनो है। लगातार व्हे रही भारी बारिश रे कारण केई गांव टापू बण गया है। घणी बरसात रे कारण घरां अर खेतां मांय पाणी भर गयो है अर कच्चा मकान पड़ गया है। लारला 24 घंटां मांय कोटा, बूंदी, टोंक, करौली, बारां, जयपुर अर सवाईमाधोपुर जिलां मांय केई ठोड़ां घणी भारी बारिश व्ही। सवाईमाधोपुर मांय आज लगातार तीजा दिन रूक-रूक र बरसात व्हेती रही। जिला कलेक्टर कानाराम हालात ने ध्यान राखता थकां जनता ऊं पाणी भरण अर तेज़ बहाव री ठौड़ां कने नी जावण री अपील कीनी है।

000

सिरोही जिला मांय ई आबूरोड़, पिण्डवाड़ा अर स्वरूपगंज समेत केई ठौड़ां चोखो मेह बरस्सो। झुन्झुनू जिला रा चिड़ावा, सुल्ताना अर आरे-सारे रा हलकां मांय दोपहरां री बगत झमाझम बारिश व्ही। चूरू अर कोटपूतली-बहरोड़ मांय ई चोखी बिरखा व्हे रही है। बांसवाड़ा, डीग, श्रीगंगानगर, जयपुर, चूरू, कोटपूतली-बहरोड़ अर बारां मांय ई बिरखा रा समाचार है। आज चित्तौड़गढ़ अर भीलवाड़ा मांय मूसलाधार बारिश रो रेड अलर्ट जारी करी ज्यो है।

ई रे अलावा नौ जिलां सारु ऑरेंज अर केई ठौड़ां सारु येलो अलर्ट जारी करी ज्यो है। मौसम केन्द्र जयपुर रा निदेशक राधेश्याम शर्मा बतायो के कोटा, बारां अर बूंदी मांय आवता दो दिन ताई तेज बरसात रा आसार है।

000

प्रदेश मांय विकसित राजस्थान 2047 रा विज़न डॉक्यूमेंट ने मंजूरी दे दीरीजी है। ई सागे ई राज्य ने ग्रीन एनर्जी हब बणावण सारु ई रोडमैप तैयार करी ज्यो है। मुख्यमंत्री भजन लाल शर्मा री सदरत मांय व्ही मीटिंग मांय अ फैसला करी ज्यो। मीटिंग मांय करी ज्यो फैसलां री जाणकारी देता थकां उद्योग मंत्री राज्यवर्द्धन सिंह राठौड़ बतायो के विजन डॉक्यूमेंट मांय सैर-सपाटा, खेती-बाड़ी अर भण्डाई-लिखाई समेत 13 हलकां माथे खास ध्यान दियो ज्यो है।

000

मीटिंग मांय अक्षय ऊर्जा ऊं जुड़्या 10 प्रस्तावां ने मंजूरी दीरीजी। ई सागे ई जयपुर मांय विश्व स्तर रो कन्वेंशन सेन्टर बणावण अर डोढ़ सौ करोड़ रुपया रा खर्च वाळी विश्वकर्मा युवा उद्यमी प्रोत्साहन योजना समेत केई प्रस्ताव मंजूर करी ज्यो। पत्रकारां ने मंत्री जोगाराम पटेल अर बाबूलाल खराड़ी ई मीटिंग मांय करी ज्यो फैसला रा बारा मांय जाणकारी दीनी।

000

मुख्यमंत्री भजन लाल शर्मा कह्यो है के राज्य सरकार महिलावां ने बधावो देवण सारु लगातार कोशिश कर रही है। वे आज जयपुर मांय वां रा रहवास माथे राखी ज्यो ई-साइकिल वितरण समारोह मांय बोल रह्या हा। मुख्यमंत्री कह्यो के सरकार टाबरियां री भण्डाई-लिखाई, महिलावां री हिफाजत अर वां ने मजबूत बणावण माथे खास ध्यान दे रही है। वे टाबरियां सागे बातचीत ई कीनी। ई मौके टाबरियां कह्यो के ई-साइकिल मिलण ऊं वां ने आवण-जावण मांय सुबीतो मिलेला, समय अर रकम री बचत सागे वे फिट इण्डिया मुहिम रो हिस्सा ई बण सकेला।

000

पेट्रोलियम मंत्री हरदीप सिंह पुरी रो काल राजस्थान रा दौरा रो कार्यक्रम है। वे मुख्यमंत्री भजन लाल शर्मा सागे बालोतरा जिला रा पचपदरा मांय तेल रिफाइनरी रो दौरा कर र वठे रा काम रो जायजो लेवेला।

000

राष्ट्रीय शिक्षा नीति ने असरदार तरीका ऊं लागू करण अर ज्ञान री देशी परम्परा ने विद्यार्थियां ताई पूगावण सारु शिक्षा विभाग री ओर ऊं राजसमंद जिला रा कुम्भलगढ मांय चिंतन बैठक राखी ज्यो। दो दिन री आ मीटिंग शिक्षा मंत्री मदन दिलावर री मौजूदगी मांय आज पूरी व्ही। ई मौके श्री दिलावर कह्यो के भण्डाई-लिखाई ने ज्ञान सागे जिन्दगी बणावण अर नौकरी-धंधा दिरावण मांय मददगार बणणी चाहिजे।

000

प्रधानमंत्री नरेन्द्र मोदी कह्यो है के भारत अंतरिक्ष हलका मांय ध्यानजोग बरकत हासिल कर रह्यो है। आज राष्ट्रीय अंतरिक्ष दिवस रे मौके वे आवता बरसां मांय देश रे अंतरिक्ष हलका मांय नुवी ऊंचाईयां हासिल करण रो भरोसा जतायो। सोशल मीडिया पोस्ट रे ज़रिए श्री मोदी देश रा अंतरिक्ष सफ़र ने मजबूत बणावण री सरकार री मंशा दोहरायी।

000

ई मौके अंतरिक्ष राज्य मंत्री डॉ. जितेंद्र सिंह कह्यो के दुनिया ऑपरेशन सिंदूर रे दौरान ई भारत रा अंतरिक्ष अर प्रौद्योगिकी बूता ने देख्यो। वे आज नई दिल्ली मांय दूजा राष्ट्रीय अंतरिक्ष दिवस समारोह मांय बोल रहया हा। राष्ट्रीय अंतरिक्ष दिवस रे मौके भारत रा अंतरिक्ष यात्री गुप कैप्टन शुभांशु शुक्ला कह्यो के गगनयान मिशन भारत रा अंतरिक्ष टेशन अर चांद री सतह माथे उतरण सागे भारत री मोटी-मोटी महत्वाकांक्षावां हैं। भारतीय अंतरिक्ष अनुसंधान संगठन-इसरो रा अध्यक्ष डॉ. वी. नारायणन कह्यो के साल 2040 ताई भारत रो अंतरिक्ष कार्यक्रम दुनिया रा किण ई दूजा अंतरिक्ष कार्यक्रम रे बराबर व्हे जावेला। वे कह्यो के मिशन चंद्रयान-4 अर वीनस ऑर्बिटर मिशन सरीखा एके पाछे एक मिशन तैय करी ज्या है। डॉ. नारायणन कह्यो के भारत साल 2035 ताई भारतीय अंतरिक्ष स्टेशन नाम रो अंतरिक्ष टेशन बणावेला जिण रो पहलो मॉड्यूल साल 2028 ताई छोड़ दियो जावेला। देश भर मांय आज दूजो राष्ट्रीय अंतरिक्ष दिवस मणायो जा रह्यो है। इण ई तारीख ने चांद रा दक्षिणी ध्रुव माथे चंद्रयान-3 कामयाबी सागे उतर्यो हो। राष्ट्रीय अंतरिक्ष दिवस रे मौके प्रदेश मांय ई केई कार्यक्रम राख्यी ज्या। केन्द्रीय मंत्री भूपेन्द्र यादव अलवर मांय राख्यी ज्या कार्यक्रम मांय शामिल व्हा। पाली रा श्री बांगड़ राजकीय उच्च माध्यमिक विद्यालय मांय राख्यी ज्या अंतरिक्ष दिवस कार्यक्रम मांय विद्यार्थियां ने मिशन चन्द्रयान समेत दूजा मुद्दा माथे जाणकारी दीरीजी।

000

वस्तु अर सेवा कर-जी.एस.टी. परिषद् री 56वीं मीटिंग वित्त मंत्री निर्मला सीतारमन री सदारत मांय तीन अर चार सितंबर ने नई दिल्ली मांय व्हेला। परिषद् री लारली मीटिंग दिसम्बर 2024 मांय जैसलमेर मांय व्ही ही। ई मीटिंग मांय पोषण युक्त चावल माथे जीएसटी री रेट मांय पांच फीसदी कटौती करण अर पैक करी ज्यी अर लेबल लगायी ज्यी चीजां री परिभाषा बदलण री सिफारिश ई करी ज्यी ही।

000

भ्रष्टाचार निरोधक ब्यूरो बांसवाड़ा रा क्षेत्रीय वन अधिकारी ने 20 हजार रुपया री घूस लेता थकां पकड़ लीनो। ए.सी.बी. ऊं मिली जाणकारी रे मुजब आरोपित शांति लाल चावला माथे फरियादी ऊं नर्सरी सुधारण अर मरम्मत रा दूजा कामां रा बिल पास करण री एवज मांय आ घूस लेवण रो आरोप है।

000

बाड़मेर जिला रा सेड़वा रा विष्णुधाम सोनणी मांय आज गुरु जम्भेश्वर मेळो भर्यो। इण मांय बिश्नोई समुदाय री ओर ऊं पर्यावरण री शुद्धि सारू यज्ञ कर र खुशहाली री कामना करी ज्यी। ई दौरान खुलो अधिवेशन ई राख्यी ज्यो।

000

प्रदेश रा किसानां ने समृद्ध अर खुशहाल बणावण सारू नुवी एफपीओ नीति लाई जा रही है। ई रा तैत राज्य मांय पांच सौ नुवा एफपीओ बणाया जावेला। कृषि विभाग रा शासन सचिव राजन विशाल रे मुजब कृषक उत्पादक संगठनां ने मजबूत बणावण, किसानां ने कम्पनी पेटेंट लाइसेंस अर मार्केटिंग लीकेज ऊं जुड़ी देवण सारू आ नीति लाई जा रही है। एफपीओ मांय एक जिला एक उत्पाद पंच गौरव ने प्राथमिकता ऊं शामिल कर्या जावेला। ई सागे ई सौ किसानां ने नॉलेज एन्हांसमेंट प्रोग्राम रा तैत परदेस मांय सिखावण दी जावेला। अ किसान नीदरलैण्ड, ऑस्ट्रेलिया अर ब्राजील मांय वठे री खेती-बाड़ी री तकनीकां री जाणकारी लेवेला।